

教匪受名號未傳徒比擬絞候

川督 題：宋大德因聽從已正法之徐鑒牧習教，受有鐸德名號，該犯究止爲徐鑒牧所惑，尚未聽從傳徒惑衆，惟該犯受名號而未傳徒，核與傳徒而未受名號者所犯雖殊，其情相等，應將宋大德比照傳教煽惑人數不多亦無名號例擬絞監候。道光二年案

因患病而拜師入會並未傳徒

浙撫 咨：姜士芳因病拜師，更名入會，茹素念經，並未傳徒，亦無收藏經卷，應比照雖未傳徒曾收藏經卷例量減一等杖一百徒三年。嘉慶十九年案

如意教唱說好話與邪教有間

直督 奏：楊老喜素習如意教，係聽從故父傳習，僅止唱說好話，第傳徒多人，並每年至韓輻良等家設立道場收錢分用，於十八年查禁教會之後，復往田輻凝等家唱說好話。將楊老喜依稱爲善友求討布施至十人以上例發近邊充軍，韓大黑子等聽從入教收徒，惟所習之如意教平日僅止唱說好話，究與別項邪教有間，將韓大黑子等於軍罪上量減一等杖一百徒三年。嘉慶二十三年案

出教免罪復被煽惑聞訪自首

直督 咨：王起美等本係大乘教會首，於免罪後復妄聽煽惑，出錢買旗，第該犯不知逆情，委係受人愚弄，且一經訪聞即行自首，尚知畏法，將王起美等照左道惑人爲從遣罪上量減一等杖一百徒三年。嘉慶二十一年案

改悔出教復又聽從圍爐燒香

提督 奏送：高允升先拜程毓蕙爲師入大乘教，已具結改悔，乃又聽從李榮等圍爐燒香，出給錢文，雖並未傳徒，實屬不知悛改，應於李榮等遣罪上量減一等杖一百徒三年。嘉慶二十二年直隸司現審案

習教改悔復用教內音樂吹打

順尹 奏傳習天主教犯張成善等於改悔後，仍用舊時邪教音樂，收藏經卷一案。奉旨：“刑部議覆順天府奏傳習天主教犯張成善等於改悔後仍用舊時邪教音樂，收藏經卷一案，請照原擬將張成善等八犯於聽從入教不知悔改發回城爲奴例上量減，張文恭一犯於收藏經卷發邊遠充軍例上量減，俱減爲杖一百徒三年，殊覺過輕。此案張成善等既經改悔何以仍敢沿用邪教音樂，且張文恭家復有藏匿未繳之經卷、十字架，是其未能真心改悔已可槩見，卽不照本例定擬，亦不應遽減杖徒。着刑部詳查成案，另行酌中妥議具奏。”欽此。仰見我皇上明慎用刑之至意，臣等不勝欽佩，當查該府尹原奏內稱，張成善、張玉川、張玉才、張文景、楊元英、田泳、張文恭並未獲之楊繼順、趙德明均曾習天主教，先後改悔，本年三月間，張成善因母出殯，憶及從前伊家喪事有同教之人用教中音樂吹打念經，欲照舊吹打熱鬧，素知張玉川等曾諳習音樂，隨邀同在伊母靈前吹打，並未念經。時張文恭與未曾習教之張成進均在彼目睹，旋被番役訪獲，張文恭並將伊姪張玉寄出教時交付漏未呈繳之經卷十字架帶案，該府尹審將張成善等八犯均比照傳習天主教，僅止聽從入教，不知悛改，發回城爲奴例上量減一等，張文恭比照各項教會收藏經卷發邊遠充軍例上量減一等，俱減爲杖一百徒三年，等因具奏。臣部以張成善等俱係曾經出教改悔之犯，現經訊明並無

復行傳習情事，止於沿用舊時音樂，收藏漏未呈繳經卷，固未便照改悔例予以勿論，若竟照不知悛改例擬發回城，未免於與實在陽奉陰違復行念經瞻禮者無所區別，亦即照擬奏覆，仰蒙聖明指示，令臣部詳查成案，另行酌中妥議具奏。臣等查例載傳習天主教僅止聽從入教不知悛改者改發回城爲奴，如能悔悟赴官首明出教，及被獲到官情願出教，當堂跨越十字架，真心改悔者，槩免治罪，儻始終執迷不悟，即照例問擬。又，各項教會收藏經卷者發邊遠充軍，如有具結改悟赴官投首者准其免罪，儻再有傳習邪教情事即按例加一等治罪，各等語。是聽從入教不知悛改例應擬遣，悔悟出教無論自首及被獲到官概免治罪，並無傳習天主教改悔後復沿用教中音樂及收藏經卷作何治罪明文，檢查歷年亦無辦過似此成案。臣等詳加酌核，張成善等於出教改悔之後並不痛除積習，仍敢沿用舊時教中音樂，並收藏經卷，實屬習與性成，誠如聖諭遽減杖徒殊覺過輕。查各項教會如於改悔免罪之後再行傳習例應加一等治罪。該犯張成善等雖於改悔後尚無傳習情事，惟沿用教中音樂、收藏經卷與真正改悔者不同，自應比例加等定擬，張成善、張玉川、張玉才、張文景、楊元英、田泳、楊繼順、趙德明、張文恭均應於原擬杖一百徒三年罪上加一等杖一百流二千里，並將該犯等先於犯事地方枷號三個月，示衆滿日再行發配，楊繼順、趙德明飭緝務獲照例辦理。道光八年直隸司案

習教改悔幫捕獲犯准充眼目

東撫 咨拏獲教匪蔡五魁一案。查此案蔡五魁聽從李孟魁學習邪教，按例應發新疆爲奴，惟該犯自知悔悟，不敢再行習教，旋赴守備劉興隆帳下充當鄉勇，據該犯供稱，伊曾拏獲教匪馬金玉等七名，稟明正法，經該省查明屬實，是所供悔悟出教之處尚屬可信。查本部審辦逆案宋進寶、宋六二犯均係先入邪教後經悔過出教，因宋進寶等曾充眼目，經本部奏請將宋進寶等仍交各衙門充當眼目